



Sumáriu Kazu
Tribunál Judisiál Primeira Instánsia Baukau
Fevereiru 2023

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 32

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	8
Artigu 145 KP	Ofensa ba integridade física simples	6
Artigu 152 KP	Maus-tratus ba kónjuje	2
Artigu 177 KP	Abuzu seksuál ba menór	1
Artigu 139 (KP), artigu 2, 3, no 35 letra (b) (LKVD) & Artigu 20 (1), artigu 2 (2 alinea f) Lei Arma Brankas	Omisídiu agravadu ho natureza violénsia doméstika no arma brankas	1
Artigu 147 Nú.1(b)	Ofensa ba integridade física grave	1
Artigu 157 KP & Artigu 20 (1), artigu 2 (2 alinea f) Lei Arma Brankas	Ameasa no arma brankas	1
Artigu 258 KP	Danu simples	1

Artigu 258 KP, artigu 145 KP & artigu 157 KP	Danu simples, ofensa ba integridade fizika simples no ameasa	1
Artigu 145 KP & Artigu 20 (1), artigu 2 (2 alinea f) Lei Arma Brankas	Ofensa ba integridade fizika simples no arma brankas	1
Artigu 260 KP	Danu ho violénsia	1
Artigu 140 KP & artigu 207 KP	Omisídiu negligente no kondusaun sein karta	1
Artigu 140 KP, artigu 148 KP & artigu 207 KP	Omisidui negligente, ofensa ba integridade negligente no kondusaun sein karta	1
Artigu 258 KP & Artigu 20 (1), artigu 2 (2 alinea f) Lei Arma Brankas	Danu simples no arma brankas	1
Artigu 172 KP no 173 KP	Violasaun seksuál ho agravaun	1
Artigu 140 KP	Omisídiu negligente	1
Artigu 179 KP	Abuzu seksuál ba ema ne'ebé labele reziste	1
Artigu 241 (1) KP	Obstrusaun ba autoridade públiku	1
Artigu 145 KP, artigu 258 KP , artigu 252 KP & artigu 20 (1), artigu 2 (2 alinea f) Lei Arma Brankas	Ofensa ba integridade fizika simples, danu simples, furtu agrvadu no arma brankas	1
Totál		32

2. Totál desizaun ne'ebé JSMP monitoriza: 22

Tipu desizaun	Artigu	Númeru
Pena prizaun	Artigu 66 KP	2
Suspensaun ba prizaun nia ezelesaun	Artigu 68 KP	7
Suspensaun ba prizaun nia ezelesaun no omologa	Artigu 68 KP	1
Pena multa	Artigu 67 KP	5
Omologa		7
Totál		22

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 10

B. Deskrisaun sumáriu julgamentu ba desizaun kazu sira

1. Krime ofensa ba integridade fizika simples

Nú. prosesu : 0020/22.BCQLC
Kompozisaun Tribunál : Singulár
Juis : Dr. Evangelino Belo
Prokuradór : Dr. Ambrosio Rangel Freitas
Defeza : Dr. Albino de Jesus Perreira
Desizaun : Omologa pedidu dezisténsia keixa

Iha 03 Feveireiru 2023, Tribunál Judisiál Primeira Instáncia Baukau prezide Julgamentu tentativa konsiliausaun ba krime ofensa ba integridade fízika simples ne'ebé envolve arguidu Donato Asunção Belo, Anacleto Belo hasoru lezadu Sebastiao Belo, iha Postu Administrativu Quelika, Munisípiu Baukau.

Akuzasaun Prokuradór

Prokuradór akuza katak, iha 10 Jullu 2022 iha oras tuku 18:00 iha tempu ne'eba lezadu Sebastião Belo ho arguidu Donato Belo, Anacleto Belo no testemuña Julio, Marcario, hamos haree iha natar, hodi halo tuir kultura hanesan sinal agradese ba natureza. Arguidu Donato Belo goja lezadu, katak Naimori mak hamulak manu, rona hanesan ne'e lezadu dehan iha ne'e ita mesak nusa mak koalía fali hanesan ne'e, depois nia ses ba tiha natar seluk, nune'e arguidu sira lori speaker mai toka fali iha fatin ne'e. Ho nune'e lezadu hirus arguidu Donato Belo ho Anacleto Belo tau hamutuk forsa hodi baku lezadu, arguidu Donato Belo tuku dala rua iha lezadu nia ulun, arguidu Anacleto Belo hakuak metin lezadu rasta iha ain no halo monu ba rai, tuir mai arguidu Anacleto Belo sae ba lezadu nia leten hodi tuku dala rua iha lezadu nia ulun besik tilun hun rezulta moras. Arguidu Donato kontinua tebe tan iha lezadu niaibun, provoka raan sai no nehan rua nakdoko no tebe lezadu nia matan fukun rezulta bubu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Prosesu tetantiva konsiliausaun

Baziea ba artigu 262 KPP antes tama ba iha julgamentu produsaun ba prova tribunál halo tentativa konsiliausaun ba krime sira ho natureza semi-públiku. Iha prosesu tentativa konsiliausaun ne'e lezadu hakarak deziste ninia keixa hasoru arguidu sira, tanba arguidu ho lezadu sira diak malu fali ona no mesak família deit.

Alegasaun finál

Prokuradór haktuir katak lezadu ho hakarak rasik deziste fila fali keixa hasoru arguidu sira, nune'e Ministériu Públiku lai iha lejitimidade, ho ida ne'e husu ba Tribunál atu omologa pedidu dezisténsia keixa ne'e.

Alende ne'e defeza aseita ho prokuradór nia alegasaun no husu ba tribunál atu omologa tiha dezisténsia keixa ne'e.

Desizaun

Bazeia ba pedidu dezisténsia husi lezadu, nune'e tribunál omologa pedidu dezisténsia keixa ne'e no absolve arguidu nain rua husi prosesu ne'e.

2. Krime ofensa ba integridade fizika simples

Nú. Prosesu ` : 0003/22.LATTL
Kompozisaun Tribunál : Singulár
Juis : Dr. Evangelino Belo
Prokuradór : Dr. Nelson de Carvalho
Defeza : Dr. Grigório Maria Lourdes de Lima
Desizaun : Omologa pedidu dezisténsia keixa

Iha 06 Feveireiru 2023, Tribunál Judisiál Primeira Instáncia Baukau prezide julgamentu tentativa konsiliaisaun ba krime ofensa ba integridade fizika simples ne'ebé envolve arguidu Hipolitu de Jesus hasoru lezadu Damiao dos Santos, Iha Suku Tutuala, Postu Administrativu Lospalos, Munisípiu Lautein.

Akuzasaun Prokuradór

Prokuradór akuza katak, iha 06 Maiu 2022, iha oras tuku 15:00 iha area Valu-Sera, Lezadu Damiao dos Santos ba hasoru arguidu iha nia restaurante ho naran Lukumorde, tanba antes ne'e, arguidu tolok lezadu nia oan feto ho naran Davina dos Santos, ne'ebé mak serbisu iha restaurante refere, tan deit la tama serbisu. Bainhira to'o iha arguidu nia restaurante, lezadu kolia ba arguidu katak, mai baku ona hau, hafoin arguidu mós halai hasoru lezadu hodi tuku dala ida iha lezadu nia matan fukun parte karuk no tuku tan dala ida iha lezadu nia oin parte karuk hafoin arguidu tebe-tan dala ida iha lezadu nia hirus matan.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa.

Prosesu tetantiva konsiliaisaun

Baziea ba artigu 262 KPP antes tama ba iha julgamentu produsaun ba prova tribunál halo tentativa konsiliaisaun ba krime sira ho natureza semi-públiku, iha tentativa konsiliaisaun ne'e lezadu hakarak deziste ninia keixa hasoru arguidu sira, tanba arguidu ho lezadu sira no mesak família deit.

Alegasaun finál

Prokuradór haktuir katak krime ne'ebé iha ho nia natureza semi-públiku, nune'e lezadu ho konsensia hakarak deziste fila fali keixa hasoru arguidu sira tanba mesak família no arguidu mós husu ona diskulpa ba lezadu. Ho ida ne'e prokuradór husu ba tribunál atu omologa tiha pedidu dezisténsia keixa ne'e.

Alende ne'e defeza mós konkorda atu omologa tiha pedidu dezisténsia keixa ne'e, tanba lezadu ho konsensia hakarak deziste fali keixa hasoru arguidu tanba mesak família, arguidu mós husu ona deskulpa ba lezadu.

Desizaun

Bazeia ba pedidu dezisténsia ho lezadu, nune'e tribunál konklui prosesu ne'e no omologa pedidu dezisténsia keixa ne'e.

3. Krime abuzu seksuál ba menór

Nú. Prosesu : 0046/18.BCSIC
Kopozisaun Tribunál : Koletivu
Juis : Dr. Evangelino Belo no Dr. José Q. S. Celestino, Dra. Maria Modesta d. A. Viera
Prokuradór : Dr. Bartolomeu de Araujo
Defeza : Dr. Cristovao Nuno Ximenes (Advogadu ECM)
Dezisaun : Pena prizaun tinan 7

Iha 07 Feveireiru 2023, Tribunál Judisiál Primeira Instánsia Baukau prezide julgamentu leitura akordaun ba krime abuzu seksuál ba menór ne'ebé envolve arguidu OJF hasoru lezada ho idade (tinan 6), iha Munisípiu Baukau.

Akuzasaun Prokuradór

Prokuradór akuza katak Lezada nu'udar nia alin fetu, aman ida deit maibá inan ketak-ketak no sira moris hamutuk iha uma ida. Iha loron 29 Jullu 2018, iha oras tuku 11:00 dadeer, testemuña CF haruka lezada ba foti nia alin nia neras iha kuartu laran, lezada mós ba kuartu laran hodi foti neras maibé bainhira lezada tama ba kuartu laran arguidu tuur uluk tiha ona iha kuartu laran kesi hela buraisa atu halo pizga atu tiru manu, bainhira lezada tama ba kuartu laran arguidu dehan ba lezada atu halo relasaun seksuál. Tuir mai arguidu haruka lezada hasai nia roupa no arguidu mós hasai nia roupa hodi kose ninia oin lulik ba iha lezada nia oin lulik to'o ezequila. Hotu tiha lezada halai sai husi kuartu laran la hatais ona kalsa no kalsa kaer deit no direktamente lezada informa ba nia inan CF kona-ba arguidu nia aktu. Nune'e tetemuña CF emidiata ba husu ba arguidu hodi husu nune'e *"tanba sa mak imi rua ó nia feton halo hanesan ne'e?"*, maibé arguidu nonook deit, testemuña haree lezada nia oin lulik mean no arguidu nia esperma habokon lezada nia faru ho isin, nune'e testemuña troka tiha lezada, relatório médiku la konsege hetan mean tanba liu loron rua mak foin teste.

Prokuradór akuza arguidu kontra artigu 177 (2) KP kona-ba abuzu seksuál ba menór ho moldura penál tinan 5 too tinan 15.

Produsaun ba prova sira

Iha prosesu julgamentu arguidu nega totalmente ba faktu hotu iha akuzasaun no deklarata katak la halo relasaun seksuál ho lezada, altura ne'eba arguidu nia aman baku arguidu, nune'e polísia ba kaer arguidu nia aman, lezada nia inan testemuña CF keixa tan arguidu ba polísia katak arguidu halo relasaun seksuál ho lezada ne'e mak polísia kaer hotu arguidu ho nia aman dala ida maibé arguidu la hatene ema ne'ebé hato'o keixa ba polísia.

Entretantu lezada deklara ba tribunál katak arguidu la kose arguidu ninia oin lulik ba lezada nia oin lulik no arguidu sempre diak ba lezada.

Testemuña CF nu'udar lezada nia inan depoimenta katak, testemuña dun deit arguidu halo relasaun seksuál hasoru lezada, tanba iha altura ne'eba testemuña haruka arguidu ba tuir nia aman iha natar, maibé arguidu lakohi ba tuir nia aman iha natar atu futu haree ne'ebé koa ona ho ida ne'e halo testemuña nervoju lori lia bosok ba polísia no halo deklarasaun falsu iha Ministériu Públiku.

Alegasaun final

Prokuradór haktuir katak mantein ho akuzasaun tanba antes ne'e perante prokuradór, arguidu, lezada no testemuña sira konfesa, nune'e prokuradór intende katak akuzasaun prokuradór provadu prosedente. Tanba ne'e prokuradór husu ba tribunál atu aplika pena prizaun tinan ualu ba arguidu. Prokuradór mós se loke prosesu investigasaun ba testemuna CF tanba halo deklarasaun falsu.

Entretantu defeza haktuir katak arguidu la halo krime refere, tanba haree ba produsaun ba prova lezada mós konfirma katak sira nain rua arguidu la halo nune'e testemuña mós fó nia depoimentu ba tribunál katak testemuña nervoju hato'o deit lia bosok ka halo falsa deklarasaun iha Prokuradór. Ho ida ne'e defeza husu ba tribunál atu absolve arguidu husi prosesu.

Desizaun

Depoisde avalia faktu hotu, tribunál prova katak akuzasaun prokuradór prosedente provadu tanba antes ne'e arguidu presta ona deklarasaun iha Prokuradór katak arguidu halo duni violasaun hasoru lezada.

Bazeia ba faktu provadu sira hotu tribunál konklui prosesu ne'e no kondena arguidu ho pena prizaun tinan hitu. Tribunál mós husu ba Prokuradór atu loke investigasaun ba testemuña CF, tanba hato'o deklarasaun falsu ba tribunál

4. Krime omisídiu agravadu ho natureza violénsia doméstika no arma brankas

Nú. Prosessu	: 0042/20. MNMNT
Kompozisaun Tribunal	: Koletivu
Juís	: Dr. Evangelino Belo, Dra. Jumiaty Maria Freitas no Dr. José Q. S. Celestino
Prokuradór	: Dr. Bartolomeu de Araújo
Defeza	: Dr. Albino de Jesus Perreira
Dezisaun	: Pena prizaun tinan 14

Iha 07 Fevereiru 2023 Tribunál Judisiál Primeira Instánsia Baukau prezide julgamentu leitura akordaun ba krime omisídiu agravadu ho natureza violénsia doméstika no arma brankas ne'ebé envolve arguidu MdS hasoru nia oan ho idade (tinan 2), iha Munisípiu Manatuto.

Akuzasaun Prokuradór

Prokuradór akuza katak iha 29 Setembru 2020, iha arguidu nia banin nia uma ho família sira seluk inklui arguidu nia feen no oan partisipa festa koremetan, momentu ne'e arguidu nia feen ba haris fila mai fatin serimonia arguidu husu xave uma nian atu ba haris maibé nia feen lakohi fó no fila kotuk la'ó dadaun no hateten ba arguidu katak *“ó labele hasee hela de'it hau tanba hau nia maun sira mós odio hela ó”*.

Tuir mai iha 30 Setembru 2020, iha oras tuku 01:00 madrugada, arguidu kous lezadu ne'ebé toba tiha ona iha baraka serimonia fatin lori ba nia banin nia uma no lori ho katana, tanba arguidu hanoin barak ona, nune'e arguidu hatoba lezadu iha banin nia varanda uza katana ko'a lezadu nia kakorok raan sai no rezulta lezadu lakon nia vida. Depoizde ko'a tiha nia oan nia kakorok arguidu tenta oho nia-an liu husi ko'a nia kakorok hodi rezulta raan sai barak no dezmai maibé la mate, arguidu konsege ba halo tratamentu iha ospital Nasionál Guidu Valadares foin rona fali katak nia oan mate tiha ona.

Prokuradór akuza arguidu kontra artigu139 (g) KP kona ba omisídiu agravadu konjuga ho artigu 2,3 no 35 (a) kona-ba Lei Kontra Violénsia Doméstika no kontra artigu 2, Nu. 1 (b), 2 (f) no artigu 20 (1) husi Lei Arma Brankas.

Produsaun ba prova sira

Iha prosesu julgamentu, arguidu konfesa faktu hotu iha akuzasaun sein rezerva no deklarata katak arguidu nia feen mak kalan laron koalia no tarata hela de'it arguidu no nia feen mós dehan lezada ne'e la'os arguidu nia oan ne'e mak halo arguidu hirus loos hodi komete aktu ne'e hasoru lezadu. Arguidu iha oan nain rua hela hotu ho arguidu, arrende ona ninia hahalok no foin primeiravés mai hatan iha tribunál.

Alegasaun finál

Prokuradór haktuir katak iha produsaun ba prova arguidu konfesa faktu hotu iha akuzasaun, arguidu ho nia feen mak sempre mosu dezintendementu maibé arguidu halo fali aktu ne'e hasoru lezadu nu'udar inosente. Arguidu mós uza katana la tuir nia funsaan hanesan uza ba agrikultura no serbisu doméstika nian maibé uza fali ba krime. Tanba ne'e husu ba tribunál atu kondena arguidu ho pena unika tinan sanulu resin ualu prizaun.

Entretantu defeza akresenta katak bazeia ba produsaun ba prova ne'ebé produs iha audénsia julgamentu parte defeza haree katak arguidu mós vítima mezmu arguidu la mate tanba hetan tratamentu husi médiku. Tanba ne'e husu ba tribunál atu aplika pena ne'ebé justu ba arguidu.

Desizaun

Depoizde avalia faktu hotu, tribunál prova katak iha 29 Setembru 2020, iha arguidu nia banin nia uma ho família sira seluk inklui arguidu nia feen no oan partisipa festa koremetan, momentu ne'e arguidu nia feen ba haris fila mai fatin serimonia arguidu husu xave uma nian atu ba haris maibé nia feen lakohi fó no fila kotuk la'ó dadaun no hateten ba arguidu katak *“ó labele hasee hela de'it hau tanba hau nia maun sira mós odio hela ó”*. Prova mós katak iha 30 Setembru 2020, iha oras tuku 01:00 madrugada, arguidu kous lezadu ne'ebé toba tiha ona iha baraka serimonia fatin lori ba nia banin nia uma no

lori ho katana, tanba arguidu hanoin barak ona, nune'e arguidu hatoba lezadu iha banin nia varanda uza katana ko'a lezadu nia kakorok raan sai no rezulta lezadu lakon nia vida. Depoisde ko'a tiha nia oan nia kakorok arguidu tenta oho nia-an liu husi ko'a nia kakorok hodi rezulta raan sai barak no dezmai maibe la mate, arguidu konsege ba halo tratamentu iha ospital Nasionál Guidu Valadares foin rona fali katak nia oan mate tiha ona.

Bazeia ba faktu provadu sira no tetu mos ho sirkunstansia atenuante sira hanesan arguidu foin primeiraves mai hatan iha tribunál, arrepende ona ninia hahalok no foin primeiraves mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan sanulu resin haat.

5. Krime ofensa ba integridade física grave ho natureza violência doméstica

Nú. Prosesu : 0008/21.BCLGA
Kopozisaun Tribunál : Koletivu
Juis : Dr. Evangelino Belo Dr. Dr. José Q. S.
Celestino, Dra. Maria Modesta d. A. Viera
Prokuradór : Dr. Bartolomeu de Araújo
Defeza : Dr. Albino de Jesus Perreira
Desizaun : Pena prizaun tinan 3 suspende ba tinan 4

Iha 07 Feveiriu 2023, Tribunál Judisiál Primeira Instánsia Baukau prezide julgamentu leitura akordaun ba krime ofensa ba integridade fizika agravante ne'ebe envolve arguida CS hasoru nia oan ho idade (tinan 7), iha Munisípiu Baukau.

Akuzasaun Prokuradór

Prokuradór akuza katak iha 04 Abril 2021, iha oras tuku 14:00 lokraik, arguida toba hela ho arguida nia oan ho kondisaun defisiénsia iha uma lara no bainhira arguida hader haree lezada la iha ona, ho nune'e arguida buka tuir lezada iha ema nia uma hodi lori fila lezada ba uma bainhira to'o uma arguida kesi lezada nia matan, foti ai baku dala barak iha lezada nia isin lolon ikus lezada mate.

Prokuradór akuza arguida kontra artigu 139 KP kona-ba omisidiu agravadu konjuga ho artigu 2,3 no 35 (a) no 36 kona-ba LKVD.

Produsaun ba prova sira

Iha prosesu julgamentu, arguida deklara katak momentu ne'e toba hela ho nia oan ne'ebé ho kondisaun defisiénsia iha uma laran no bainhira arguida hader haree lezada la iha, nune'e arguida buka tuir lezada no hetan iha viziñu nia uma no lori lezada mai iha uma mak uza ai-kakeu hodi baku dala tolu iha lezada nia liman parte loos no baku dala tolu iha lezada nia ain parte loos, ai-ne'ebé uza baku lezada ne'e nia kulit mak fekit kona lezada nia reen-toos rezulta kanek, arguida nega katak la kesi lezada nia matan. Arguida deklara mos katak nu'udar inan la iha intensaun oho lezada ne'ebé nu'udar nia oan, maibe momentu ne'e preokupa tanba sira nia uma besik mota. Bainhira tribunál apresenta relatóriu médiku ba arguida no arguida argumenta katak arguida baku lezada neneik deit hanesan hanorin, maibe derepente lezada mate, nune'e arguida konsidera lezada nia mate ne'e kauza husi kultura.

Testemuña SB nu'udar viziñu depoimenta katak testemuña la hatene kona-ba faktu sira ne'e maibé momentu ne'e arguida mak husu testemuña nia telemovel dehan atu kontaktu família sira.

Alegasaun finál

Prokuradór haktuir katak iha prosesu julgamentu arguida konfesa parsial ba faktu iha akuzasaun katak la uza hena kesi metin lezada nia oin no la uza ai-kakeu ne'ebé ho ninia medida hanesan kadeira nia ain hodi baku lezada, mezmu nune'e iha relatóriu médiku hatudu katak, lezada lakon nia vida tanba kauza husi agresaun arguida nian. Ho nune'e prokuradór konsidera arguida provadu komete krime omisídiu simples hasoru lezada no husu ba tribunál atu kondena arguida ho pena ne'ebé minimu husi artigu 139 KP.

Entretantu defeza iha nia alegasaun haktuir katak arguida deklaradeit faktu ne'ebé nia komete haree ba produsaun ba prova arguida nega kesi metin lezada nia matan, nune'e iha rezultadu husi relatóriu médiku hatudu katak mate tanba agresaun ne'e ladun loos, tanba tuir esperiensa ne'ebé mak iha rezultadu autopsia mak klaru, no arguida mós baku hanorin nian mak derpenti deit lezada mate, maibé arguida laiha intensaun atu oho nia oan rasik. Ho nune'e defeza husu ba tribunál hare mós ba kondisaun sosial sira hotu no biolojikamente arguida ho kondisaun isin rua fulan hitu, Tanba ne'e husu ba tribunál aplika pena ne'ebé justu ba arguida.

Desizaun

Depoisde avalia faktu hotu ne'ebé produs durante julgamentu tribunál halo alterasaun kualifikasaun juridika husi krime omisídiu simples ba fali krime ofensa ba integridade física grave. Bazeia ba faktu provadu hirak ne'e no tetu mós ho sirkunstánsia atenunte sira tribunál konklui prosesu ne'e no kondena arguida ho pena prizaun tinan tolu suspende ba tinan haat.

6. Krime ofensa ba integridade física simples ho natureza violénsia doméstika

Nú. Prosesu : 0089/22.BCBCV
Kopozisaun Tribunál : Singulár
Juíz : Dra. Maria Modesta d. A. Viera
Prokuradór : Dr. Bartolomeu de Araújo
Defeza : Dr. Albino de Jesus Perreira
Desizaun : Pena multa US\$40.00

Iha 07 Feveireiru 2023, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade física simples ho natureza violénsia doméstika, ne'ebé envolve arguidu JB, haosru nia feen, iha Munisípiu Baukau.

Akuzasaun Prokuradór

Prokuradór akuza katak iha 16 Juñu 2022, iha oras tuku 15:00 lokraik, lezada fila husi serbisu fatin, telefone ba arguidu maibé arguidu nia nomor sibuk hela deit, ho nune'e lezada tuir arguidu ba iha arguidu nia serbisu fatin arguidu telefone hela fetu seluk. Ho nune'e lezada koaliala ba arguidu katak hau lao serbisu hanesan ne'e buka osan afinal

osan ne'e hodi sosa pulsa telefone ba feto, ho nune'e arguidu tebe dala ida iha lezada nia kabun no tuku dala ida iha lezada nia hirus matan, lezada emidiatamente ba hato'o keixa iha polisia no kontinua ba halo tratamentu iha Sentru Saúde Baukau.

Produsaun ba prova sira

Iha produsaun ba prova arguidu konfesa integralmente ba faktu hotu iha akuzasaun no iha akontesimentu ne'e arguidu simu duni telefone no koalia duni ho feto, ho nune'e lezada derepenti de'it mosu husi kotuk basa no tuku arguidu, nune'e arguidu halo agresaun hasoru lezada.

Alende ne'e lezada konfirma faktu hotu iha akuzasaun no deklarata katak lezada telefone ba arguidu, maibe arguidu nia nomor sibuk hela, nune'e lezada ba tuir arguidu iha serbisu fatin, arguidu koalia hela ho feto seluk liu husi telefone ne'e mak lezada basa no tuku arguidu no arguidu komete aktu ne'e hasoru lezada.

Alegasan finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mos husi lezadahaktuir katak arguidu konfesa integralmente ba faktu sira iha akuzasaun, nune'e atu prevene krime hanesan akontese tan iha futuru husu ba tribunál atu kondena arguidu ho pena prizaun fulan ida suspende ba tinan ida.

Entretantu defeza haktuir katak arguidu konfesa faktu hotu iha akuzasaun, arguidu no lezada ninia deklarasaun hanesan katak lezada mak baku uluk arguidu, nune'e arguidu komete aktu ne'e hasoru lezada. Tanba ne'e husu ba tribunál atu aplika pena admoestasaun ba arguidu.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kabun no tuku dala ida iha lezada nia hirus matan.

Bazeia ba faktu provadu sira ne'e no tetu mos ho sirkunstánsia atenuante sira hanesan arguidu konfesa no kolabora diak ho tribunál, nune'e tribunál konklui prosesu ne'e no kondena arguidu ho pena multa US\$40.00 ne'ebé arguidu sei selu sentavus 0,50 kada loron durante loron 80. Tribunál mos fiksa pena alternativa durante loron 53 prizaun, bainhira arguidu la kumpri pena multa refere.

7. Krime ameasa no arma brankas

Nú. Prosesu	: 0089/20. BCBCV
Kompozisaun Tribunál	: Singulár
Juis	: Dra. Jumiaty Maria Freitas no Dr. José Q. S. Celestino, Dra. Maria Modesta d. A. Viera
Prokuradór	: Dr. Bartolomeu de Araujo
Defeza	: Dr. Sidonio Maria Sarmiento
Desizaun	: Omologa pedidu dezisténsia keixa no pena prizaun tinan 3 suspende ba tinan 3

Iha 09 Febreiru 2023, Tribunál Judisiál Primeira Instánsia Baukau prezide julgamentu leitura akordaun ba krime ameasa no arma brankas ne'ebé envolve arguidu FM hasoru nia feen no Estadu RDTL, iha Munisípiu Baukau.

Akuzasaun Prokuradór

Prokuradór akuza katak iha 07 Agostu 2020, iha oras tuku 20:00 kalan, arguidu ho lezada diskute malu kona-ba lezada estraga hotu umane sira nia osan nune'e arguidu tolok lezada no lezada mós responde ho tolok, nune'e arguidu foti katana hodi ameasa no duni lezada no lezada halai ba iha banin sira nia uma.

Prokuradór akuza arguidu kontra artigu 157 KP kona-ba ameasa ho nia moldura penál to'o tinan 1 ka multa no artigu 20 Lei Arma Brankas.

Antes tama ba produsaun ba prova bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu ho lezada relasiona ho krime ameasa hasoru lezada tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, lezada hakarak deziste nia keixa hasoru arguidu. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime arma brankas, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ona nia hahalok, arguidu mak sustenta nia oan hamutuk nain ualu inklui nia feen.

Alende ne'e, lezada sai testemuña fali ba kazu arma brankas, maibé lezada lakohi fó ninia depoimentu tanba relasaun nu'udar feen.

Alegasaun finál

Prokuradór haktuir katak iha produsaun ba prova arguidu konfesa faktu hotu iha akuzasaun, arguidu uza katana la tuir nia funsaun maibé uza fali ba krime. Tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Enkuantu defeza haktuir katak bazeia ba produsaun ba prova arguidu konfesa, arrepende ona nia hahalok, parte defeza husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu hotu tribunál prova katak arguidu foti katana hodi ameasa lezada no duni lezada.

Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ona nia hahalok. Ho nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

8. Krime ofensa ba integridade fízika simples

Nú. prosesu : 0065/21/VQVQQ.
Kompozisaun Tribunál : Singulár
Juis : Dr. Evangelino Belo
Prokuradór : Dr. Bartolomeu de Araújo
Defeza : Dr. Albino de Jesus Perreira
Desizaun : Omologa pedidu dezisténsia keixa

Iha 10 Feveiru 2023, Tribunál Judisiál Primeira Instáncia Baukau Prezide julgamentu tentativa konsiliaun ba krime ofensa ba integridade fízika simples ne'ebé envolve arguida Santina Soares, Ernesto no Joao da Costa hasoru lezada Maria Soares Amaral iha Munisípiu Vikeke.

Akuzasaun Prokuradór

Prokuradór akuza katak iha 12 Dezembru 2021, iha oras tuku 08:00, iha Bairro Ratau, Vikeke, nune'e lezada Maria Soares Amaral fó hatene ba nia alin Mariana atu hein kios derepenti arguidu Ernesto mosu mai diskuti malu ho lezada. Hafoin arguidu Ernesto buti ho maka'as iha lezada nia kakorok no lori kadeira masa baku iha lezada nia liman parte karuk no loos. Arguida Santina Soares tuku dala ida iha lezada nia kotuk laran no kaer lezada nia fu'uk hodi rasta ba kotuk no rakut lezada nia hirus matan, depoisde ne'e arguidu João da Costa buti lezada nia kakorok no tuku dala ida iha lezada nia hirus matan.

Prokurador akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no artigu 258 KP kona-ba danu simples ho moldura penál to'o tinan 3 ka multa.

Prosesu tentativa konsiliaun

Bazeia ba artigu 262 Kódigu Prosesu Penál (KPP) antes tama ba julgamentu produsaun ba prova tribunál halo tentativa konsiliaun ba krime sira ho natureza semi- públiku iha prosesu tentativa konsiliaun ne'e lezada hakarak deziste ninia keixa hasoru arguidu sira tanba arguidu ho lezada sira mesak família, nune'e parte arguidu simu no konkorda dezisténsia keixa ne'e no perante tribunál arguidu husu deskulpa ba lezada.

Alegasaun finál

Prokuradór haktuir katak iha tentativa konsiliaun ne'e lezada deziste ona keixa hasoru arguidu, tanba ne'e husu ba tribunál atu omologa dezisténsia keixa.

Defeza akresenta katak arguidu hatudu sira ninia arrependimentu perante tribunál no husu ona deskulpa ba lezada, nune'e husu ba tribunál atu omologa pedidu dezisténsia keixa no absolve arguidu husi prosesu ne'e.

Desizaun

Bazeia ba pedidu dezisténsia ne'e tribunál konklui prosesu ne'e no omologa pedidu dezisténsia keixa ne'e no absolve arguidu sira husi prosesu ne'e.

9. Krime ofensa ba integridade fízika simples

Nú. Prosesu : 0013/22.MNMNT
Kopozisaun Tribunál : Singulár
Juis : Dr. Evangelino Belo
Prokuradór : Dr. Ambrosio Rangel Freitas
Defeza : Dr. Albino de Jesus Perreira
Desizaun : Pena multa US\$45.00 ba kada arguidu

Iha 10 Fevereiru 2023, Tribunál Judisiál Primeira Instánsia Baukau prezide julgamentu ba krime ofensa ba integridade fízika simples, ne'ebé envolve arguidu Filipi Soares, Octavio Soares, hasoru lezada Domingas Mesquita, iha Suku Iliheu, Postu Administrativu Manatuto Villa, Munisípiu Manatuto.

Akuzasaun Prokuradór

Prokuradór akuza katak Iha 18 Marsu 2022, iha oras tuku 06:00 dadeer, arguidu Filipe tebe lezada rezulta lezada monu ba rai no arguidu Octavio tuku dala ida iha lezada nia matan fukun. Antes agresaun ne'e, arguidu sira deskonfia lezada mak halo arguidu sira nia inan mate, tanba deskonfia lezada buan.

Prokuradór akuza arguidu sira kontra artigu 145 KP kona-ba ofensa ba integridade fízika simples ho moldura penal too tinan 3 ka multa.

Produsaun ba prova sira

Iha julgamentu, arguidu Filipe deklara katak iha akontesimentu ne'e iha oras tuku 04:00 dadeer, lezada la liuhusi uma oin maibe lezada liu husi fali uma kotuk no hafuhu arguidu nia inan, nia isin mate, nune'e arguidu haree hetan lezada halai ba tiha. Ho nune'e lezada mosu fila fali iha uma oin por volta oras tuku 5 hanesan ne'e hatais hotu metan no fuuk husik la lori buat ida mak mai vizita aguidu nia inan nia isin mate. Ho nune'e arguidu Filipe nervoju tebe lezada no arguidu Octavio basa lezada. Arguidu mós deklara katak arrepende ona nia hahalok no foin primeiravés mai hatan iha tribunál.

Alende ne'e arguidu Octavio deklara katak antes ne'e arguidu Filipe konta ona lezada nia hahalok ne'e ba arguidu nune'e bainhira lezada mosu mai arguidu Filipe halo agresaun no arguidu mós nervozu basa dala ida iha lezada nia matan fukun parte loos. Arguidu mós deklara katak arrepende ona ninia hahalok no foin primeiravés mai hatan iha tribunál.

Alende ne'e lezada mós konfirma faktu hotu iha akuzasaun no deklara mós katak arguidu sira deskonfia lezada mak halo sira nia inan mate ka duun lezada buan.

Alegasaun finál

Prokuradór konsidera arguidu sira provadu komete krime ofensa ba integridade fízika simples hasoru lezada, nune'e husu ba tribunál atu kondena arguidu ho pena multa US\$50 no selu mós indemnizasaun sivíl ba lezada ho montante US\$2.00 ba gastu ne'ebé lezada uza ba sosa ai-moruk.

Entretantu defeza husu ba tribunál atu kondena arguidu ho pena admoestasaun ho konsiderasaun katak arguidu sira konfesa no arrepende ona sira nia hahalok no arguidu sira nia kondisaun ekonomia la suficiente atu selu multa.

77148872

Desizaun

Depoisde avalia faktu hotu, tribunál prova katak arguidu Filipe tebe lezada rezulta lezada monu ba rai no arguidu Octavio tuku dala ida iha lezada nia matan fukun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu sira konfesa, arrepende ona sira ninia hahalok, nune'e tribunál konklui prosesu ne'e no kondena kada arguidu ho pena multa US\$45.00 ne'ebé arguidu sira sei selu 0,50 sentavus kada lora durante lora 90. Tribunál mós fiksa pena alternativa durante lora 60 prizaun, bainhira arguidu sira la kumpri pena multa refere no arguidu sira selu mós indemnizasaun sivil ba lezada US\$50.00.

10. Krime danu simples

Nú. Prosesu : 0033/22. PDBAU
Kompozisaun Tribunál : Singulár
Juis : Dr. Evangelino Belo
Prokuradór : Dr. Bartolomeu de Araújo
Defeza : Dr. Antonio Fernandes
Desizaun : Omologa pedidu dezisténsia keixa

Iha 10 Fevereiro 2023, Tribunál Judisiál Primeira Instánsia Baukau prezide Julgamentu tentativa konsiliaun ba krime danu simples ne'ebé envolve arguidu Amaro Quintáo hasoru lezadu Jeronimo Soares, iha Aldeia Beredek, Suku Karaubalu, Postu Administrativu Vikeke, Munisípiu Vikeke.

Akuzasaun prokuradór

Prokuradór akuza katak iha 25 Janeiro 2022, iha oras tuku 16:00 lokraik, arguidu ba tesi hotu lezadu nia tali metan hamutuk hun lima no arguidu mós la fó kuñesementu ba lezadu. Antes agresaun ne'e, tanba arguidu atu konstrui nia uma iha fatin refere maibé lezadu lakohi atu arguidu konstrui uma iha fatin refere. Prejuizu ne'ebé lezadu hetan mak talimetan hun lima no kada hun ida ho folin US\$20.00, nune'e hun lima ne'e ho folin hamutuk US\$100.00.

Prokuradór akuza arguidu kontra artigu 258 KP kona-ba danu simples ho moldura penál to'o tinan 3 ka multa.

Prosesu tetantiva konsiliaun

Bazeia ba artigu 262 KPP antes tama ba julgamentu produsaun ba prova tribunál halo tentativa konsiliaun ba krime sira ho natureza semi-públiku. Iha prosesu tentativa konsiliaun ne'e lezadu hakarak deziste ninia keixa hasoru arguidu tanba arguidu ho lezadu mesak família no bolu malu tiun ho subriñu, arguidu ho konsensia rasik husu deskulpa ba lezadu, arguidu hatudu nia arrendementu katak saida mak halo ba lezadu ne'e hahalok la diak. Lezadu konkorda no hakarak deziste nia keixa hasoru arguidu.

Alegasaun finál

Prokuradór konkorda ho dezisténsia keixa ne'e no husu ba tribunál atu omologa pedidu dezisténsia keixa ne'e, tanba lezadu perdua ona arguidu no aguidu mós husu ona diskulpa ba lezadu.

Entretantu, defeza haktuir katak perante tribunál arguidu arrepende ba nian hahalok no husu ona deskulpa ba lezadu nu'udar família. Nune'e husu ba tribunál atu omologa pedidu dezisténsia keixa ne'e no absolve arguidu husi prosesu ne'e.

Desizaun

Bazeia ba pedidu dezisténsia ne'e tribunál konklui prosesu ne'e no omologa pedidu dezisténsia keixa ne'e no absolve arguidu sira husi prosesu ne'e.

11. Krime danu simples, ofensa ba integridade fízika simples no ameasa

Nú. prosesu : 0003/21/LASIC.
Kompozisaun Tribunál : Singulár
Juis : Dr. Evangelino Belo
Prokuradór : Dr. Ambrosio Rangel Freitas
Defeza : Dr. Grigório Maria Lourdes de Lima
Desizaun : Omologa pedidu dezisténsia keixa

Iha 13 Fevereiru 2023, Tribunál Judisiál Primeira Instáncia Baukau prezide julgamentu tentativa konsiliaun ba krime danu simples no ofensa ba integridade fízika simples no ameasa ne'ebé envolve arguidu Oscar Fernandes Xavier no arguidu Johanes da Costa hasoru lezadu Epifanio G. F. Xavier do Nascimento, Tomas Gentil Fernandes Xavier, Aquino Israel Coro Xavier, Adito Ventura Fernandes Xavier, Amos Antônio Fernandes Xavier, Benino Aquino Xavier, Eufragio Faviano Fernandes, iha Aldeia Vailowaia, Suku Com, Postu Administrativu Lautein Munisípiu Lautein.

Akuzasaun Prokuradór

Prokuradór akuza katak iha 01 Janeiro 2021, iha oras tuku 15.00 lokraik, arguidu sira hemu tua hamutuk no kanta haksolok hodi komemora tinan foun iha arguidu Oscar Fernandes Xavier nia uma. Arguidu Johanes da Costa, kuñesido ho naran Sika Malay, hakilar no dehan família Fernandes Xavier Milisia no oho tiha Fernandes Xavier. Rona tiha liafuan ne'e lezadu sira sente tauk hodi hakbesik ba arguidu sira hodi husu tuir no fó hanoin ba sira para la bele halo provokasaun tan kazu ne'ebé akontese uluk entre sira rezolve ona, alende ne'e, tempu ne'eba estadu emerjensia, nune'e labele halibur malu hodi halo barulhu. Arguidu sira la simu no sira foti fatuk hodi tuda hasoru lezadu sira, rezulta lezadu balun hetan kanek no estraga mós lezadu sira balun nia uma, ho deskrisaun detalha hanesan tuir mai ne'e lezadu Epifanio G. F. Xavier do Nascimento hetan tuda iha liman rua no iha ain tu'ur, rezulta moras, bubu no kanek kiik. Lezadu Tomas Gentil Fernandes Xavier hetan tuda rezulta nia blok uma nian balun nakfera kalen halo didin iha dapur nian naksobu, ho prejuízu inferior husi US\$50,00. Lezadu sira seluk, Aquino Israel Coro Xavier, Adito Ventura Fernandes Xavier, Amos Antônio Fernandes Xavier, Benino Aquino Xavier, Eufragio Faviano Fernandes, mezmua la hetan kanek,

maibé arguidu sira mós tuda sira no lakona tanba lezadu sira ses aan tiha. Antes ne'e arguidu ho lezadu sira iha ona problema maibé rezolve tiha ona entre família iha 2020. Lezadu no arguidu sira sei iha relasaun família no hela besik malu.

Prokuradór akuza arguidu sira komete krime kontra artigu 145 KP kona ba ofensa ba integridade fizika simples ho moldura penál too tinan 3 ka multa, artigu 258 KP kona-ba danu simples ho moldura penál too tinan 3 ka multa no artigu 157 KP kona-ba ameasa ho moldura penál too tinan 2 ka multa.

Prosesu tentativa konsiliaun

Bazeia ba artigu 262 KPP antes tama ba iha produsaun ba prova tribunál halo tentativa konsiliaun ba krime sira ho natureza semi públiku Iha prosesu tentativa konsiliaun ne'e lezadu sira hakarak deziste ninia keixa hasoru arguidu sira tanba arguidu ho lezadu sira mesak família, nune'e parte arguidu simu no konkorda dezistensia keixa ne'e, perante tribunál arguidu sira husu deskulpa ba lezadu sira.

Alegasaun finál

Prokuradór haktuir katak iha tentativa konsiliaun ne'e lezadu sira deziste ona keixa hasoru arguidu sira, tanba ne'e husu ba tribunál atu omologa dezistensia keixa ne'e.

Defeza akresenta katak arguidu sira hatudu sira ninia arrependimentu perante tribunál husu ona deskulpa ba lezadu sira, nune'e husu ba tribunál atu omologa pedidu dezisténsia keixa ho konsikuensia absolve arguidu sira husi prosesu.

Desizaun

Bazeia ba artigu 262 KPP, tribunál halo tentativa konsiliaun entre parte sira no lezadu sira hakarak deziste sira ninia keixa hasoru arguidu, nune'e tribunál hasai ninia despaixu hodi omologa dezisténsia keixa no absolve arguidu sira husi prosesu ne'e.

12. Krime ofensa ba integridade física simples no arma brankas

Nu. Prosesu	: 0100/22. BCBCV
Kompozisaun Tribunal	: Koletivu
Juis	: Dra. Jumiaty Maria Freitas no Dra. Maria Modesta d. A. Viera, Dr. Evangelino Belo
Prokuradór	: Dr. Nelson de Carvalho
Defeza	: Dr. Grigório Maria Lourdes de Lima
Dezisaun	: Pena prizaun tinan 2 fulan 5 loran 28 suspende ba tinan 3

Iha 14 Feveireiru 2023, Tribunál Judisiál Primeira Instánsia Baukau prezide julgamentu leitura akordaun ba krime ofensa ba integridade física simples no arma brankas ne'ebé envolve arguidu Francelino Marques (prezu) hasoru lezadu Basilio Piedade, iha Suku Wailili, Postu Administrativu Baukau Vila, Munisípiu Baukau.

Akuzasaun Prokuradór

Prokuradór akuza katak iha 08 Jullu 2022, iha oras tuku 17:56 lokraik, lezadu joga hela bingo derepente arguidu mosu iha fatin refere kaer ho katana hodi hakilar katak jagoan

iha ne'e la iha hafoin arguidu mós lori liman hodi hatudu ba lezadu katak *"ida mak ó"* no taa lezadu nia kabaas parte karuk kotuk nian rezulta kanek. Hafoin arguidu halai ses husi fatin akontesimentu nune'e komidade sira kontaktu polisia no ambulansia transporta lezadu ba ospital Baukau hodi halo tratamentu.

Prokuradór akuza arguidu kontra artigu 146 (b no c) KP kona-ba ofensa ba integridade fizika grave no artigu 2 alinea b Nú.2 alinea f no artigu 20 Lei Arma Brankas.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arguidu husu makina baku haree atu baku nia haree, maibé lezadu koalio netik dehan *"lalika tanba uluk o uza ema seluk nia hen traktor mak halai natar tanba ne'e o ba buka ema seluk nia makina mak baku o nia haree,"* nune'e arguidu komete aktu refere hasoru lezadu. Arguidu mós deklarata katak arrepende ona ninia hahalok, foin primeiravés mai hatan iha tribunál no promete sei la komete tan krime hanesan iha futuro.

Alende ne'e, lezadu mós konfirma faktu hotu iha akuzasaun no deklarata katak nia kanek to'o agora seidak diak loos, kaer serbisu todan labele no labele kaer serbisu kleur. Iha relasaun familia no lezadu nu'udar arguidu nia tiun, nune'e lezadu hakarak perdua arguidu ne'ebé nu'udar nia tiun.

Alegasaun finál

Prokuradór konsidera arguidu provadu komete krime hasoru lezadu, bazei aba konfisaun arguidu nian no konfirma mós husi lezadu. Tanba ne'e husu ba tribunál atu kondena arguidu ba pena únika tinan neen iha kadeia.

Entretantu defeza haktuir katak bazeia ba produsaun prova ne'ebé produs iha audensia julgamentu hanesan arguidu konfesa, arrepende ona ninia hahalok, foin primeiravés mai hatan iha tribunál. Tanba ne'e husu ba tribunál atu aplika pena ne'ebé adekua ba arguidu.

Desizaun

Depoisde avalia faktu hotu, tribunál prova katak taa lezadu nia kabaas parte karuk kotuk nian rezulta kanek no bazeia mós ba relatóriu médiku hatudu katak kanek refere kanek kmaan. Bazeia ba faktu sira ne'e hotu tribunál halo alterasaun jurídik husi artigu 146 kona-ba ofensa ba integridade fizika simples ba fali artigu 145 KP kona-ba ofensa ba integridade fizika simples no krime arma brankas.

Bazeia ba faktu provadu sira hotu no tetu mós ho sirkunstánsia atenuante sira hanesan arguidu konfesa, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuro, nune'e tribunál konklui prosesu ne'e no kondena arguidu ho pena prizaun tinan rua fulan lima loron rua nulu resin ualu suspende ba tinan tolu no selu mós indemnizasaun sivíl ba lezadu ho valor US\$100.00. Tribunál mós liberta arguidu husi prizaun preventiva.

13. Krime maus-tratus ba kónjuje

Nú. prosesu : 0011/21.LASIC
Kompozisaun Tribunál : Koletivu
Juis : Dra. Maria Modesta d. A. Viera no Dra. Jumiaty Maria
Freitas, Dr. José Q. S. Celestino
Prokuradór : Dr. Nelson de Carvalho
Defeza : Dr. Sidonio Maria Sarmiento
Desizaun : Pena prizaun tinan 2 fulan 6 suspensaun ba tinan 2 fulan 6

Iha 16 Fevereiru 2023, Tribunál Judisiál Primeira Instánsia Baukau prezide julgamentu leitura akordaun ba krime maus-tratus ba konjuje ne'ebé envolve arguidu AS hasoru nia feen, iha Munisípiu Lautein.

Akuzasaun Prokuradór

Prokuradór akuza katak iha loron no fulan ne'ebé la apura maibé iha tinan 2018, iha oras tuku 23:00 kalan, arguidu ho kondisaun lanu sein razaun tuku dala rua iha lezada nia ulun.

Tuir mai iha loron no fulan ne'ebé la apura maibé iha tinan 2019, iha oras tuku 18:00 kalan, arguidu basa dala rua iha lezada nia ulun. Antes agresaun ne'e, arguidu ho lezada diskute malu kona-ba arguidu konduz motorizada TUM-TUM no la hatama osan ba nia patraun nune'e patraun ba husu osan ba lezada ne'e mak lezada konfirma ba arguidu, nune'e arguidu komete ne'e aktu ne'e hasoru lezada.

Tuir mai iha loron no fulan ne'ebé la apura maibé iha tinan 2020, iha oras tuku 17:00 lokraik, arguidu foti ai-sanak hodi baku dala haat iha lezada nia kotuk laran no ain-kabun parte loos.

Iha 15 Janeiru 2021, iha oras tuku 23:00 kalan, arguidu tebe dala haat iha lezada nia ain-tuur. Antes agresaun ne'e, arguidu ho lezada diskute malu kona-ba sira nia oan ne'ebé sei ki'ik tanis tanba moras, nune'e lezada haruka arguidu atu ko'us maibé arguidu lakohi no komete aktu ne'e hasoru lezada.

Iha 22 Janeiru 2021, iha oras tuku 21:00 kalan, arguidu lori ai-sar baku dala ida iha lezada nia kotuk laran. Antes agresaun ne'e, arguidu ho lezada diskute malu kona-ba lezada lahatan arguidu atu ba mate uma, nune'e mosu agresaun ne'e.

Iha 23 Janeiru 2021, iha oras tuku 13:00 meiodia, arguidu tuku dala barak iha lezada nia kotuk laran kontinua lori kadeira masa baku iha lezada nia kotuk laran dala ida no lori ai-sanak baku dala ualu iha lezada nia kotuk laran. Antes agresaun ne'e, arguidu ho lezada diskute malu kona-ba arguidu husu ba lezada atu ba mate uma, maibe lezada la hatan, nune'e mosu agresaun ne'e.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(b), 35(a) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak husu ona diskulpa ba lezada, maibé moris separa ona ho lezada depoisde akontesimentu ida ikus.

Entretantu lezada kontinua konfirma faktu hotu iha akuzasaun no deklarata katak sira kontinua moris separa, maibé iha relasaun di'ak ba malu to'o argora la iha ona problema arguidu mós husu ona deskulpa ba lezada maibé lezada seidak hanoin kona-ba sira atu moris hamutuk fali.

Alegasaun finál

Prokuradór konsidera arguidu provadu komete krime hasoru lezada no halo tratamentu kruel hasoru lezada, bazeia ba konfisaun arguidu nian no konfirma mós husi lezada. Tanba ne'e husu ba tribunál atu kondena arguidu ho pena prizaun maibé suspende ninia ezekezasaun.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa no arguidu husu ona diskulpa ba lezada.

Desizaun

Depoisde avalia faktu hotu, tribunál prova katak arguidu provadu komete krime hasoru lezada, bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa no husu ona diskulpa ba lezada, nune'e tribunál konklui prosesu ne'e no kondena arguidu ho pena prizaun tinan rua fulan neen suspende ba tinan rua fulan neen.

14. Krime maus-tratus ba kónjuje

Nú. prosesu : 0071/22 BCBCV
Kompozisaun Tribunál : Koletivu
Juis : Dra. Maria Modesta Viara, Dra. Jumyati Freitas, Dr. José Quintão
Prokuradór : Dr. Nelson de Carvalho
Defeza : Dr. Sidonio Sarmiento
Desizaun : Pena prizaun tinan 2 fulan 6 suspende ba tinan 2 fulan 6

Iha 17 Feveireiru 2023, Tribunál Judisiál Primeira Instánsia Baukau prezide julgamentu leitura akordaun ba krime maus-tratus ba kónjuje ne'ebé envolve arguidu JDMB hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha loron ne'ebé la apura maibé iha Maiu 2020, iha oras tuku 19.00 kalan, sein motivu ne'ebé klaru arguidu tuku dala tolu iha lezada nia kaniruk.

Tuir mai iha loron no fulan ne'ebé la apura, maibé iha Juñu 2020, iha oras 22.00 kalan, arguidu basa dala rua iha lezada nia hasan. Antes agresaun ne'e, arguidu ho lezada

diskute malu kona-ba arguidu haruka lezada hasai lezada nia rounpa maibé lezada lakohi, ho nune'e mosu agresaun ne'e.

Tuir mai iha loron ne'ebé la apura maibé iha Juñu 2020, iha oras tuku 18.00 lokraik, sein motivu ne'ebé klaru arguidu tuku dala tolu iha lezada nia ibun no basa dala tolu iha lezada nia hasan parte loos.

Tuir mai iha loron ne'ebé la apura maibé iha Agostu 2020, iha oras 20.00 kalan, arguidu baku dala rua iha lezada nia kabaas parte karuk no tuku dala ida iha lezada nia inus. Antes agresaun ne'e, arguidu haruka lezada atu suru etu maibé lezada hatan katak "*hau lakohi tanba kolen,*" ho nune'e mosu agresaun ne'e.

Tuir mai iha loron ne'ebé la apura maibé iha Marsu 2021, iha oras tuku 10.00, arguidu tebe dala ida iha lezada nia kanuruk no tuku dala ida iha lezada nia reen-toos. Antes agresaun ne'e, arguidu ho lezada diskute malu kona-ba lezada diskonfia arguidu ho fetu seluk nune'e arguidu nervozu no direktamente tebe dala ida kona iha lezada nia kanuruk no tuku dala ida iha lezada nia rentos.

Tuir mai iha 21 Abril 2022, iha oras tuku 20.00, arguidu tuku dala tolu iha lezada nia hasan parte karuk, basa dala rua iha lezada nia hasan parte loos. Antes agresaun ne'e, arguidu ho lezada diskute malu kona-ba arguidu hetan suratahan KB nian iha armari leten, nune'e arguidu husu ba lezada no mosu agresaun ne'e.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o to'o tinan 6 konjuga ho artigu 2, 3(b), 35(a) no 36 LKVD.

Produsaun ba provas sira.

Iha prosesu julgamentu arguidu konfesa faktu hotu iha akuzasaun no deklarata katak diak malu ona ho lezada no moris hamutuk nafatin iha uma ida hanesan feen ho laen no arguidu mós husu ona diskulpa ba lezada no promete sei la komete tan krime hanesan iha futuro.

Alende ne'e lezada kontinua konfirma faktu hotu iha akuzasaun no deklarata katak diak malu ona ho arguidu no depoisde akontesimentu sira ne'e arguidu la komete ona krime hasoru lezada.

Alegasaun Finál

Prokuradór konsidera arguidu provadu komete krime maus-tratus ba kónjuje bazeia ba konfisaun arguidu nian no konfirma mós husi lezada no kazu ne'e laos akontese dala ida de'it maibé arguidu repete ninia hahalok ne'e dala barak, nune'e husu ba tribunál atu kondena arguidu tuir krime ne'ebé nia komete.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, diak malu ona ho lezada no agora dadaun sira moris hamutuk nafatin hanesan feen ho laen.

Desizaun

Depoisde avalia faktu hotu, tribunál prova katak faktu hotu iha akuzasaun provadu, Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, diak malu ona ho lezada no moris hamutuk nafatin hanesan feen ho laen, nune'e tribunál konklui prosesu ne'e no kondena arguidu ho pena prizaun tinan rua fulan neen suspende ba tinan rua fulan neen.

15. Krime ofensa ba integridade fizika simples

Nú. Prosesu : 0025/21. VQUCB
KompozisaunTribunál : Singulár
Juis : Dra. Maria Modesta d. A. Viera
Prokuradór : Dr.Nelson Carvalho
Defeza : Dr. Grigório Maria Lourdes de Lima
Desizaun : Omologa pedidu dezisténsia keixa

Iha 17 Fevereiru 2023, Tribunál Judisiál Primeira Instánsia Baukau Prezide julgamentu tentativa konsiliaun ba krime ofensa ba integridade fizika simples ne'ebé envolve arguidu Jacinto Guterres (nu'udar professor) hasoru lezada Alda da Silva Amaral (estudante) iha Munisípiu Vikeke.

Akuzasaun Prokuradór

Prokuradór akuza katak iha 24 Novembru 2021, iha oras tuku 09:00 dadeer, lezada tuir hela izame iha sala laran arguidu lori ai-sanak baku dala rua iha lezada nia ulun.

Tuir mai iha 25 Novembru 2021, iha oras tuku 09:00 dadeer, lezada nafatin tuir izame iha aula laran arguidu karolu dala ida iha lezada nia ulun rezulta lezada sofre moras no bubu iha lezada nia ulun.

Prokurador akuza arguidu kontra artigu 245 KP kona-ba ofensa ba integridade fizika simples ho moldura penál too tinan 3 ka multa.

Prosesu Tentativa Konsiliaun.

Bazeia ba artigu 262 KPP antes tama ba iha produsaun ba prova tribunál halo tentativa konsiliaun ba krime sira ho natureza semi-públiku Iha prosesu tentativa konsiliaun ne'e lezada hakarak deziste ninia keixa hasoru arguidu, tanba sei iha relasaun família no arguidu mós konkorda ho dezstensia keixa ne'e no husu diskulpa ba lezada no promete sei la komete tan krime hanesan iha futuro.

Alegasaun finál

Prokuradór haktuir katak iha tentativa konsiliaun ne'e lezada hakarak deziste ninia keixa hasoru arguidu, tanba ne'e husu ba tribunál atu omologa pedidu dezisténsia keixa ne'e.

Defeza konkorda ho pedidu dezisténsia keixa ne'e no husu ba tribunál atu omologa prosesu ne'e.

Desizaun

Bazeia pedidu dezisténsia husi lezada, nune'e tribunál konklui prosesu ne'e no omologa pedidu dezisténsia keixa ne'e no absolve arguidu husi prosesu ne'e.

16. Krime ofensa ba integridade fízika simples

Nú. prosesu : 0156/22 BCBCV.
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Nelsoan Carvalho
Defeza : Dr. Albino de Jesus Perreira
Desizaun : Omologa pedidu dezisténsia keixa

Iha 17 Feveireiru 2023, Tribunál Judisiál Primeira Instánsia Baukau prezide julgamentu tentativa konsiliaun ba krime ofensa ba integridade fízika simples ne'ebé envolve arguidu hasoru lezada Umbelina, lezada Augusta Lucia, iha Aldeia Lekiloiuatu, Suku Triloka, Munisípiu Baukau.

Akuzasaun Prokuradór

Prokuradór akuza katak iha 02 Novembru 2022, iha oras tuku 18:00 lokraik, iha Simitériu, lezada Umbelina ho nia oan feto Augusta Lucia ho lezada nia inan kiik ho naran Virginia da Silva ba sunu lilin iha sira nia tiun nia rate. Bainhira lezada sira sunu hela lilin derepente arguidu mosu mai hodi la koalia buat ida kedas kedas dala tolu tutuir malu iha lezada Umbelina nia ulun parte karuk rezulta lezada monu ba rai no lakon konsensia no mi-an kedas iha fatin akontesimentu, nune'e lezada Augusta atu ba sori netik arguidu kontinua tuku dala ida iha lezada nia ulun parte karuk, arguidu ninia agresaun ne'e rezulta lezada sira sente moras iha ulun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal too tinan 3 ka multa.

Tentativa konsiliaun

Bazeia ba artigu 262 KPP antes tama ba iha julgamentu produsaun ba prova tribunál halo tentativa konsiliaun ba krime sira ho natureza semi- públiku iha prosesu tentativa konsiliaun ne'e lezada sira hakarak deziste sira ninia keixa hasoru arguidu tanba sira sei iha relasaun família, arguidu mós konkorda ho pedidu dezisténsia keixa ne'e no husu diskulpa ba lezada sira.

Alegasaun finál

Prokuradór haktuir katak iha tentativa konsiliaun ne'e lezada deziste ona keixa hasoru arguidu tanba ne'e husu ba tribunál atu omologa prosesu dezisténsia keixa ne'e.

Defeza mós konkorda ho pedidu dezisténsia keixa ne'e no husu ba tribunál atu omologa pedidu dezisténsia keixa ne'e.

Desizaun

Bazeia ba pedidu dezisténsia keixa husi lezada, tribunál konklui prosesu ne'e no omologa prosesu dezisténsia keixa ne'e.

17. Krime ofensa ba integridade fízika simples ho natureza violénsia doméstika

Nú. prosesu : 0002/22. MNMNT
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Nelson de Carvalho
Defeza : Dr. Albinu de Jesus Perreira
Desizaun : Pena multa US\$50.00

Iha 21 Feveireiru 2023, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LCA hasoru nia feen, iha Munisípiu Manatuto.

Akuzasaun Prokuradór

Prokurador akuza katak iha 19 Marsu 2022, iha oras tuku 21: 30 kalan, arguidu tebe dala ida iha lezada nia liman fuan, buti iha lezada nia kakorok no dudu lezada monu tun ba semente leten. Antes agresaun ne'e, arguidu ho lezada diskute malu kona-ba bainhira arguidu toba hela lezada lori ain fanun arguidu atu arguidu hader hodi kous sira nia oan, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun no deklarasaun katak depoisde akontesimentu sira diak malu ona, maibé tanba iha tan problema nune'e arguidu ba tiha ninia família sira no sira nia oan hela ho lezada.

Alende ne'e lezada kontinua konfirma faktu hotu iha akuzasaun lezada mós konfirma ho arguidu ninia deklarasaun katak depoisde akontesimentu ne'e sira diak malu fali, maibé depoisde mosu problema mak arguidu ba hela tiha ho ninia família sira.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirma mós husi lezada, nune'e husu ba tribunál atu kondena arguidu ho pena admoestasaun.

Defeza mós konkorda ho alegasaun ministériu publiku nian atu kondena arguidu ho pena admoestasaun.

Desizaun

Depoisde avalia faktu hotu tribunál prova katak arguidu tebe dala ida iha lezada nia liman fuan, buti iha lezada nia kakorok no dudu lezada monu tun ba semente leten.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, nune'e tribunál konklui prosesu ne'e no kondena arguidu ho pena multa US\$50.00 ne'ebé arguidu sei selu 0,50 sentavus kada loron durante loron 100. Tribunál mós fiksa pena alternativa durante loron 66 prizaun, bainhira arguidu la kumpri pena multa refere.

18. Krime ofensa ba integridade fízika simples ho natureza violénsia doméstika

Nú. Prosesu : 0157/22. BCBCV
KompozisaunTribunál : Singulár
Juis : Dra. Maria Modesta d. A. Viera
Prokuradór : Dr. Nelson de Carvalho
Defeza : Dr. Grigório Maria Lourdes de Lima
Desizaun : Pena multa US\$45.00

Iha 21 Fevereiru 2023, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu VdPF hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 01 Novembru 2022, maiszumenus iha oras tuku 21.00 kalan, arguidu uza biskaleta labarik nian hodi baku dala ida iha lezada nia ulun rezulta kanek no moras. Antes agresaun ne'e, lezada diskute malu ho ninia kuñada, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu ne'e, arguidu konfesa faktu hotu iha akuzasaun no deklarata katak depoisde akontesimentu ne'e arguidu ho lezada dia malu kedas no moris hamutuk nafatin hanesan feen ho laen.

Alende ne'e lezada kontinua konfirma faktu hotu iha akuzasaun no konfirma mós ho arguidu ninia deklarasaun katak depoisde akontesimentu ne'e sira diak malu kedas no agora moris hamutuk nafatin hanesan feen ho laen.

Alegasaun finál

Prokurador konsidera arguidu provadu komete krime hasoru lezada bazeia ba konfisaun arguidu nian no konfirma mós husi lezada, ho nune'e husu ba tribunál atu kondena arguidu ho pena admoestasaun.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun katak arguidu konfesa, diak malu ona ho lezada no moris hamutuk nafatin hanesan feen ho laen.

Desizaun

Depoisde avalia faktu hotu, tribunál prova katak arguidu uza biskeleta labarik nian hodi baku dala ida iha lezada nia ulun rezulta kanek no moras.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, diak malu ona ho lezada no moris hamutuk nafatin hanesan feen ho lean, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

19. Krime ofensa ba Integridade física simples ho natureza violénsia doméstika

Nú. prosesu : 0032/22/VQVQQ
Kompozisaun Tribunál : Singulár
Juis : Dr. Evangelino Belo
Prokuradór : Dr. Bartolomeu de Araújo
Defeza : Dr. Albino de Jesus Perreira
Desizaun : Pena multa US\$67.50

Iha 22 Fevereiro 2023, Tribunál Judisiál Primeira Instánsia Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AM hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 15 Jullu 2022, iha oras tuku 23:00 kalan, arguidu tebe dala tolu iha lezada nia kotuk laran. Antes agresaun ne'e, arguidu ho lezada diskute malu kona-ba arguidu haruka lezada ba haris maibé lezada tama fali ba kuartu laran no lakohi haris.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál too tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun no deklarata katak depoisde akontesimentu ne'e lezada la fila ba uma no sira moris separa ona.

Tanba arguidu konfesa, prokurador hato'o pedidu hodi presinde tiha lezada ninia deklarasaun tanba arguidu konfesa, nune'e tribunal simu pedidu hodi presinde lezada ninia delarasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian, nune'e husu ba tribunál atu kondena arguidu ho pena multa.

Entretantu defeza husu ba tribunál atu kondena arguidu ho pena admoestasaun ho konsiderasaun katak arguidu konfesa no hakarak diak malu fali ho lezada, maibé lezada mak lakohi.

Desizaun

Depoisde avalia faktu hotu, tribunál prova katak arguidu tebe dala tolu iha lezada nia kotuk laran.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, nune'e tribunál konklui prosesu ne'e no kondena arguidu ho pena multa US\$67.50 ne'ebé arguidu sei selu 0,75 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

20. Krime danu ho violénsia

Nú. prosesu :0037/18. LASIC
Kompozisaun Tribunál : Koletivu
Juis : Dra. Maria Modesta d. A. Viera no Dra. Jumiati Maria Freitas, Dr. José Q. S. Celestino
Prokuradór : Dr. Ambrosio Rangel Freitas
Defeza : Dr. Albino de Jesus Perreira
Desizaun : Pena prizaun fulan 6 suspende ba tinan 1 ba kada arguidu

Iha 24 Fevereiru 2023, Tribunál Judisiál Primeira Instánsia Baukau prezide julgamentu leitura sentensa ba krime danu no violénsia ne'ebé envolve arguidu Januario da Costa Cabral, Nazario Baptista, Paulo Bony hasoru lezada Julieta do Carmo lezadu Dinis da Costa hasoru lezadu Jonito Fernandes, iha Munisípiu Lautein

Akuzasaun Prokuradór

Prokuradór akuza katak iha 01 Maiu 2018, iha oras tuku 22.00 kalan, lezada Julieta do Carmo ho lezadu Denis da Costa sira nia uma hetan estragus husi arguidu sira, iha Aldeia Laru Wara, Suku Fuiloro, Postu Administrativu Lospalos, Munisípiu Lautein. Iha momentu ne'eba, lezada Joanito Fernandes ho nia rian sira ho naran Ronaldo, Melino no Denis Pereira hemu hela tua iha uma no lezadu Jonito Fernandes fila ba toba no nia rian sira continua hemu tua. Iha ema nain rua hosi Luro ho motorizada atu ba sira nia uma iha bairu Luturu no lezadu nia rian nain tolu hapara motorizada ne'e no baku joven nain rua ne'e. Hosi lezadu nia rian nain tolu ne'e nia asaun hodi hamosu joven sira hosi Luro hodi mai ataka lezada Julieta do Carmo ho lezadu Denis da Costa sira nia uma

Arguidu Januario da Costa ho arguidu Nazario Baptista tuda fatuk ba iha lezadu sira nia uma hodi kona mós iha lezadu Jonito Fernandes nia hasan parte karuk hodi rezulta kanek. Arguidu Paul Bony mós lori fatuk tuda kona iha lezada Jonito Fernandes hodi rezulta kanek. Konsekuensia husi arguidu Januario da costa ho arguidu Nazario Baptista sira nia konduta rezulta lezada Julieta do Carmo ho lezadu Denis da Costa hetan prejuizu ho valor hamutuk US\$54.00), husi vidru tahan sanulu resin ualu, ne'ebé hetan estraga

no espelo bo'ot ida ho valor US\$20.00 ho valor osan hamutuk US\$64.00. Konsekuensia hosi arguidu Paul Bony nia konduta rezulta lezadu Jonito Fernandes hetan kanek iha nia hasan parte karuk,

Prokuradór akuza arguidu sira kontra artigu 260 KP kona-ba danu ho violénsia ho moldura penal tinan 4 too tinan 12.

Produsaun ba prova sira

Iha prosesu julgamentu ne'e arguidu sira konfesa faktu hotu iha akuzasaun no deklarata katak hakarak atu selu fali sasan ne'ebé sira estraga ona, maibé lezada no lezadu mak lakohi tanba sira sei iha relasaun família no agora dadaun sira diak malu ona.

Lezada Juleita sertidaun Notifika lezadu Junito sertidaun negativu.

Alegasaun finál

Prokuradór konsidera arguidu sira provadu komete krime danu no violénsia, arguidu konfesa integral ba faktu hotu iha akuzasaun, aguidu sira ho lezadu no lezada diak malu ona iha akordu dame, nune'e husu ba tribunál atu kondena aguidu ho pena prizaun tinan tinan ida suspende ba tinan rua.

Alende ne'e defeza mós konkorda ho prokuradór ninia alegasaun atu kondena arguidu ho pena prizaun tinan ida suspende ba tinan rua.

Desizaun

Depoizde avalia faktu hotu, tribunál konsidera faktu hotu provadu. Bazeia ba faktu provadu sira ne'e no tetu mós ho sirkunstánsia atenuante sira hanesan arguidu sira konfesa, nune'e tribunál konkluir prosesu ne'e no kondena arguidu sira ho pena prizaun fulan neen suspende ba tina ida.

21. Krime omisídiu negligente no kondusaun sein karta

Nú. Prosesu : 0042/22. LASTR
Kompozisaun Tribunál : Singulár
Juis : Dra. Maria Modesta d. A. Viera
Prokuradór : Dr. Ambrosio Rangel Freitas
Defeza : Dr. Grigório Maria Lourdes de Lima
Desizaun : Pena prizaun tinan 1 suspende ba tinan 1 fulan 6

Iha 28 Feveireiru 2023, Tribunál Judisiál Primeira Instánsia Baukau prezide julgamentu leitura sentensa ba krime omisídiu negligente no kondusaun sein karta ne'ebé envolve arguidu Elisitio Pontes da Silva hasoru lezadu Abina Marta Teolentino, iha Suku Kom Postu Administrativu Lautein, Munisípiu Lautein.

Akuzasaun Prokuradór

Prokuradór akuza katak iha 10 Outubru 2022, iha oras tuku 19:30 kalan, iha área Iraulu Aldeia Sikara, Suku Kom arguidu kondus kareta kamioneta mitsubisi Colt, ho xapa

matrikula A.53.300 TIs, bainhira halo estasaun la ho kuidadu hodi hamosu asidente hodi sama lezada mate iha fatin akontesimentu.

Prokuradór akuza arguidu kontra artigu 35 KP kona-ba krime iha konkursu no artigu 140 KP kona-ba omisídiu neglijente ho moldura penal too tinan 5 no artigu 207 KP kona-ba kondusaun sein karta ho moldura penal too tinan 2 ka multa.

Produsaun ba prova sira

Iha prosesu julgamentu arguidu deklara katak faktu iha akuzasaun ne'e loos, depoisde akontese polísia detein ona arguidu, nune'e família sira mak hela resolve kona despeza ba lezada nia mate. Lezada ne'e patraun nia oan rasik no patraun ne'e arguidu nia tiun kiik, sira mesak família uma laran no agora sira di'ak malu ona.

Testemuña Amilcar Teolentino nu'udar lezada nia aman depoimentu katak, kareta ne'e ninian lezada mós testemuña nia oan, tanba sira mesak família uma laran, arguidu nia aman ajuda osan ho valor US\$800.00 ba serimonia funeral.

Alegasaun finál

Prokuradór haktuir katak iha produsaun prova arguidu konfesa faktu hotu iha akuzasaun katak lezada mate no arguidu mós la iha karta kondusaun, arguidu ho lezada sei família diak malu ona. Tanba ne'e husu ba tribunál kondena arguidu ba pena prizaun tinan ida suspende ba tinan ida. Kona ba objetu apresenta dokumentu komprovativu durante fulan neen nia laran karik liu prazu legal objetu refere afavor ba estadu.

Enkuantu defeza haktuir katak bazeia ba produsaun prova parte defeza husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál konsidera faktu hotu provadu no arguidu mós laiha karta kondusaun. Bazeia ba faktu provadu sira no tetu mós sirkunstánsia atenuante sira hanesan arguidu konfesa, arguidu ho família matebian mós diak malu ona, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen, bazeia ba dokumentu komprovativu sira ne'ebé iha nune'e fó fila objetu ne'e ba nain.

22. Krime ofensa ba integridade física simples ho natureza violéncia doméstika

Nú. Prosesu	: 0019/22. BCEVN
Kompozisaun Tribunál	: Singulár
Juis	: Dra. Maria Modesta d. A. Viera
Prokuradór	: Dr. Bartolomeu de Araújo
Defeza	: Dr. Albino de Jesus Perreira
Desizaun	: Pena prizaun fulan 2 suspende ba tinan 1

Iha 28 Fevereiru 2023, Tribunál Judisiál Primeira Instánsia Baukau prezide leitura sentensa ba krime ofensa ba integridade física simples ho natureza violéncia doméstika ne'ebé envolve arguidu DS hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 29 Agostu 2022, iha oras tuku 06:45 dadeer, arguidu tuku dala ida iha lezada nia kanuruk no tebe dala ida iha lezada nia hirus matan. Antes agresaun ne'e, arguidu ho lezada diskute malu kona-ba lezada fanu arguidu, tanba lezada kuda hela ai-oan iha polibek, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3, 35 no 36 LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun, arrepende ona nia hahalok no foin primeiravés mai hatan iha tribunál, arguidu nu'udar agrikultor ho rezultadu hodi sustenta de'it família.

Alende ne'e, lezada mós konfirma faktu hotu iha akuzasaun no deklara katak iha akontesimentu ne'e polísia mos to'o kedas iha fatin akontesimentu ne'e no lori kedas arguidu ho lezada ba iha Eskuadra Polísia Venilale no lezada kontinua ba halo tratamentu iha Sentru Saúde Venilale, lezada hela ho nia bin sira hafoin arguidu ba tuir bolu lezada sira hela hamutuk fali no to'o agora la baku ona lezada.

Alegasaun finál

Prokuradór haktuir katak iha produsaun ba prova arguidu konfesa faktu hotu iha akuzasaun no konfirma mós husi lezada, nu'udar la'en tuir loloos proteze lezada maibé kontrariu fali arguidu mak halo agresaun hasoru lezada. Tanba ne'e husu ba tribunál kondena arguidu ba pena prizaun fulan tolu suspende ba tinan ida.

Enkuantu defeza haktuir katak bazeia ba produsaun prova arguidu konfesa arrepende ba ninia hahalok, nune'e parte defeza konkorda ho alegasaun prokuradór nian.

Desizaun

Depoisde avalia faktu hotu, tribunál prova katak arguidu tuku dala ida iha lezada nia kanuruk no tebe dala ida iha hirus matan.

Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl